

Broj: 05/2-19-5-378/24  
Sarajevo, 31.05.2024. godine

**BOSNA I HERCEGOVINA  
FEDERACIJA BOSNE I HERCEGOVINE  
Parlament Federacije BiH  
Predstavnički dom  
Hamdije Kreševljakovića 3  
71 000 Sarajevo  
Sekretar Ivan Miličević**

Bosna i Hercegovina  
Federacija Bosne i Hercegovine  
**PARLAMENT FEDERACIJE  
SARAJEVO**

Primljeno:		03-06-2024	
Org. jed.	Broj	Priloga	Vrijednost
0511	-02-	227	124

**BOSNA I HERCEGOVINA  
FEDERACIJA BOSNE I HERCEGOVINE  
Parlament Federacije BiH  
Predstavnički dom  
Hamdije Kreševljakovića 3  
71 000 Sarajevo  
Zastupnik Damir Nikšić**

**PREDMET:** Odgovor na zastupničko pitanje, zastupnik Damir Nikšić, d o s t a v l j a.-

**VEZA:** Vaš akt broj: 05/1-02-227/24 od 23.04.2024.godine

Poštovani,

Vezano za zastupničko pitanje zastupnika Damira Nikšića, broj i datum kao u vezi, a, kojim se traži izvještaj o stanju na lokacijama kamenoloma koji su prestali sa radom, a za koje je Federalno ministarstvo okoliša i turizma izdalo okolišne dozvole za rad uz zahtjev da ovo ministarstvo podnese sažet pismeni izvještaj o stanju na lokacijama kamenoloma koji su prestali sa radom, a za koje je ovo ministarstvo prethodno izdalo okolišnu dozvolu za rad.

Takođe se traži informaciju koliko je njih ispunilo zakonsku obavezu rekultivacije i remedijacije kamenoloma, koliko ih je saniralo kosinu, posadilo biljke itd., a koliko njih to nije uradilo te koji koraci su poduzeti u tim slučajevima i kada se očekuje njihovo rješenje dajemo slijedeći odgovor:

Od osnivanja ministarstva do danas Federalnom ministarstvu okoliša i turizma nije podnesen zahtjev za izdavanje okolinske dozvole za prestanak rada i zatvaranje kamenoloma za koje je ministarstvo izdalo okolinsku dozvolu.

Ovo ministarstvo izdaje okolinsku dozvolu na rok od pet godina koji počinje da teče od dana uručenja rješenja stranci.

Ministarstvo ne prati po službenoj dužnosti niti postoji zakonska obaveza praćenja isteka okolinske dozvole niti postoji obaveza praćenja da li je subjekt koji je obveznik okolinske dozvole podnio zahtjev za njenu obnovu nakon isteka od pet godina. Takođe ne postoji ni obaveza praćenja da li je neko privredno društvo prestalo sa radom.

Federalno ministarstvo posjeduje samo evidenciju izdatih okolinskih dozvola.

Provjera faktičkog stanja na terenu i da li je subjekt ishodio ili obnovio okolinsku dozvolu shodno zakonskoj obavezi te da li je prestao sa radom u nadležnosti je Federalne uprave za inspekcijske poslove.

U slučaju zatvaranja kamenoloma i prestanka eksploatacije okolinska dozvola je samo jedan od pet obaveznih akata koje privredno društvo prilaže uz zahtjev za izdavanje dozvole za potpunu i trajnu obustavu eksploatacije. Ako privredno društvo ne podnese zahtjev za okolinsku dozvolu ovo ministarstvo ne može ni imati evidenciju/podatke da li je neki kamenolom zatvoren i prestao sa radom.

Zbog navedenog Federalno ministarstvo okoliša i turizma ne raspolaže evidencijom o broju zatvorenih kamenoloma kojima je ovo ministarstvo izdavalo okolinsku dozvolu.

Samim tim ovo ministarstvo nije u mogućnosti da sačini traženi pismeni izvještaj o stanju na lokacijama kamenoloma koji su prestali sa radom, a za koje je ovo ministarstvo prethodno izdalo okolišnu dozvolu za rad.

Prestanak rada i zatvaranje kamenoloma te sanacija i rekultivacija kamenoloma se radi u skladu sa rudarskim projektom prema odredbama Zakona o rudarstvu Federacije BiH („Službene novine Federacije BiH“ broj 26/10).

Okolinska dozvola nije dozvola za rad nego se okolinskom dozvolom propisuju mjere za smanjenje emisija i monitoring (mjerjenje) emisija u okoliš.

Dozvolu za rad kamenoloma daje Federalno ministarstvo energije, rudarstva i industrije ili nadležno kantonalno ministarstvo na osnovu odredbi Federalnog zakona o rudarstvu.

U skladu sa Zakonom o rudarstvu dozvole i za rad i sve druge dozvole neophodne za rad kamenoloma izdaje Federalno ministarstvo energije, rudarstva i industrije ili nadležno kantonalno ministarstvo u skladu sa **članom 37. Zakona o rudarstvu** („Službene novine Federacije BiH“ broj 26/10) koji glasi:

## Dozvole

Za izvođenje rudarskih radova iz člana 8. ovog zakona, koji se odnose neposredno na eksploataciju mineralnih sirovina potrebno je od Federalnog ministarstva, odnosno kantonalnog ministarstva nadležnog za rudarstvo pribaviti sljedeće dozvole:

1. dozvola za eksploataciju;
2. dozvola za potpunu i trajnu obustavu eksploatacije;
3. dozvola za izvođenje radova prema rudarskom projektu;
4. dozvola za upotrebu rudarskih objekata, postrojenja, uređaja i instalacija - upotrebna dozvola;
5. dozvola za vršenje periodičnih pregleda, mjerenja i ispitivanja oruđa za rad i uređaja, fizičkih, hemijskih i bioloških uticaja i izdavanje odgovarajućih isprava u rudarstvu;
6. privremena dozvola za izvođenje radova i
7. konačna dozvola za izvođenje radova.

Dozvole iz stava 1. ovog člana tač. 1., 2., 3., 4., 6. i 7. za mineralne sirovine iz člana 7. stav 1. tač. 1., 2. i 3. ovog zakona izdaje Federalno ministarstvo.

Dozvole iz stava 1. ovog člana tač. 1., 2., 3., 4., 6. i 7. za mineralne sirovine iz člana 7. stav 1. tač. 4., 5. i 6. ovog zakona izdaju kantonalna ministarstva nadležna za rudarstvo.

Dozvole iz stava 1. tačka 5. ovog člana izdaje Federalno ministarstvo.

Dozvole iz stava 3. ovog člana za mineralne sirovine čije se eksploataciono polje proteže na više kantona izdaje Federalno ministarstvo.

Takođe vezano za sanaciju i zatvaranje kamenoloma navedene aktivnosti su regulisane čl. 42 i 58. i 59. Zakona o rudarstvu:

Član 42.

### **Dozvola za potpunu i trajnu obustavu eksploatacije**

#### **Uz zahtjev za izdavanje dozvole za potpunu i trajnu obustavu eksploatacije privredno društvo dužno je priložiti:**

1. ugovor o koncesiji;
2. revidovan rudarski projekt za obustavu eksploatacije;
3. urbanističku saglasnost;
4. okolinsku dozvolu;
5. obrazloženje potpune i trajne obustave eksploatacije i odluku privrednog društva o potpunoj i trajnoj obustavi eksploatacije.

Dozvola za potpunu i trajnu obustavu eksploatacije sadrži podatke o:

1. postojanju ugovora o koncesiji;
2. vrsti mineralne sirovine koja je predmet obustave eksploatacije sa količinama preostalih rezervi;
3. obavezi privrednog društva o trajnom čuvanju tehničke dokumentacije koja se odnosi na eksploataciju mineralne sirovine;
4. obavezi privrednog društva o provođenju mjera sigurnosti kojima će se trajno isključiti mogućnost nastajanja opasnosti po ljude i imovinu;
5. odobrenju ulaska u eksploataciono polje za otklanjanje posljedica eksploatacije;
6. obavezi privrednog društva o sanaciji i rekultivaciji eksploatacionog područja u skladu sa projektom za predmetno eksploataciono polje;
7. položaju i tačnim granicama eksploatacionog polja;
8. ažurnom stanju izvedenih radova do vremena obustave i
9. roku obustave

Član 58.

Potpuna i trajna obustava rudarskih radova

U slučaju da privredno društvo iz bilo kojeg razloga odluči potpuno i trajno obustaviti izvođenje rudarskih radova na eksploataciji mineralnih sirovina na svim objektima ili na samo jednom objektu na kojem se izvode rudarski radovi, mora pri tome poštovati odredbe ovog zakona.

Potpunu ili trajnu obustavu izvođenja rudarskih radova eksploatacije mineralnih sirovina privredno društvo mora prijaviti Federalnom ministarstvu, odnosno kantonalnom ministarstvu nadležnom za rudarstvo i nadležnoj rudarskoj inspekciji u roku od 15 dana prije početka obustave radova.

Federalno ministarstvo, odnosno kantonalno ministarstvo nadležno za rudarstvo može imenovati komisiju koja će na licu mjesta provjeriti razloge obustave radova. Privredno društvo mora komisiji predložiti dokumentaciju na osnovu koje je izvodilo radove na eksploataciji mineralnih sirovina i donijelo odluku o potpunoj i trajnoj obustavi izvođenja radova, kao i rudarski projekt zatvaranja rudarskog objekta na kojem prestaje eksploatacija.

U sastav komisije iz stava 3. ovog člana pored predstavnika Federalnog ministarstva, odnosno kantonalnog ministarstva nadležnog za rudarstvo imenuju se i predstavnici Federalnog ministarstva prostornog uređenja, Federalnog ministarstva okoliša i turizma, odnosno kantonalnih ministarstava nadležnih za prostorno uređenje i okoliš. Poslije izvršenog pregleda komisija sačinjava zapisnik sa prijedlozima daljnjih mjera i

dostavlja ga Federalnom ministarstvu, odnosno kantonalnom ministarstvu nadležnom za rudarstvo. Zapisnik predstavlja stručnu podlogu za izdavanje dozvole za obustavu eksploatacije iz člana 42. ovog zakona.

Član 59.

### **Sanacija i rekultivacija posljedica rudarskih radova na okoliš**

Poslije dobijanja dozvole za obustavu eksploatacije mineralne sirovine iz člana 37. tačka 2. ovog zakona, privredno društvo mora izvršiti konačnu sanaciju zemljišta i rekultivaciju okoliša i otkloniti posljedice nastale pri izvođenju rudarskih radova, a na osnovu projekta sanacije i rekultivacije.

Privredno društvo dužno je, prema projektu izvođenja rudarskih radova, u kontinuitetu vršiti sanaciju zemljišta i tehničku rekultivaciju devastiranih površina nastalih usljed rudarskih radova. Prije obavljanja konačne sanacije privredno društvo dužno je provesti mjere osiguranja kako bi se trajno isključile opasnosti po život i zdravlje ljudi i imovine i mogući uzročnici zagađenja okoliša, odnosno štete na objektima i okolišu.

O izvršenim radnjama iz st. 1., 2. i 3. ovog člana privredno društvo dužno je obavijestiti Federalno ministarstvo, odnosno kantonalno ministarstvo nadležno za rudarstvo, nadležnu rudarsku inspekciju i federalnu, odnosno kantonalnu inspekciju za okoliš.

Federalno ministarstvo, odnosno kantonalno ministarstvo nadležno za rudarstvo na osnovu obavještenja iz stava 4. ovog člana izvršit će tehnički pregled kojim će se utvrditi da li je sanacija i rekultivacija okoliša izvedena u saglasnosti sa rudarskim projektom i da li su provedene mjere iz stava 3. ovog člana dovoljne, o čemu će izdati potvrdu privrednom društvu. Ako provedene mjere nisu dovoljne naredit će se privrednom društvu da u određenom roku otkloni utvrđene nedostatke.

Ako privredno društvo ne postupi po nalogu iz stava 5. ovog člana, Federalno ministarstvo, odnosno kantonalno ministarstvo nadležno za rudarstvo provest će potrebne mjere sigurnosti na trošak privrednog društva.

U obavljanju tehničkog pregleda iz stava 5. ovog člana učestvuju i predstavnici Federalnog ministarstva, odnosno kantonalnih ministarstava nadležnih za rudarstvo, nadležnih ministarstava za prostorno uređenje, okoliš i turizam i poljoprivredu, vodoprivredu i šumarstvo.

Troškove tehničkog pregleda snosi privredno društvo.

Nadzor nad provođenjem odredbi Zakona o rudarstvu vrši rudarska inspekcija u skladu sa čl. 92., 93., 94., 95. i 100.

S poštovanjem



Dostaviti:

- Sekretaru Predstavničkog doma Parlamenta Federacije BiH
- Zastupniku Damir Nikšić
- a/a